

## **В ПЯТНИЦУ 5-Й СЕДМИЦЫ ПО ПАСХЕ**

### **В ЧЕТВЕРТОК ВЕЧЕРА,**

На Господи воззвах: стихиры подобны, глас 4-й:

**Подобен:** Господи, возшед на Крест:

**Видите,** Егоже преднаписа Моисей, Иисуса Мессию, в законе приити, на земли явльшася благоутробия ради и мне беседовавша яко Человека на кладязе: воистинну Сей есть Христос в мир грядый, сущим в Сихаре самаряныня явися глаголющи.

**От** сладких уст жены, воду приемую, сладкую истекающую, сущии во граде пиюще, и ко кладязю источающему обилие воды, потщахуся тещи скоро и источник видети приснотекущий, истаявшия души воспрохлаждающий.

**Сообразный** видяще источник, и единовидный человеческого составления, жене вопияху во граде сущии: не ктому твоя ради беседы мы веровахом, воистинну познавше, яко Той есть избавление и спасение миру вечное.

**Слава, и ныне: глас 6-й:**

**При** студенце Иаковли обрет Иисус самаряныню, просит воду от нея, облаками покрываяй землю. О чудесе! Иже херувимы носимый, блуднице жене беседоваше, воды прося, Иже на водах землю повесивый: воды иский, Иже источники и езера вод изливаяй: хотя привлеци сию воистинну, уловяему от сопостата врага, и напоити ю водою живою, палимую в безместных лютых, яко един Благоутробный и Человеколюбец.

**На стиховне стихира крестная, глас 4-й:**

**Всегда** имуща Христе, Крест Твой на помощь, сети вражия удобь попираем.

**Стих:** К Тебе возведох очи мои:

**Воскресна:** Господи, возшед на Крест, прадедною нашу клятву потребил еси, и сошед во ад, вечныя узники свободил еси, нетление даруя человеческому роду: сего ради поюще славим животворящее и спасительное Твое востание.

**Стих:** Помилуй нас Господи, помилуй нас:

**Мученичен:** Жертвы одушевленные, всесождения словесная, мученицы Господни, за коления совершенна Божия, Бога знающая, и Богом знаемая овчата, ихже ограда волком невходна, молитесь и нам упасеным быти с вами на воде упокоения.

**Слава, и ныне: глас 6-й:**

**Тако** глаголет Господь самаряныни: аще бы еси ведала дар Божий, и Кто есть глаголяй тебе, даждь Ми воды пити, ты бы просила у Него, и дал бы ти пити, да не вжаждешия во веки, глаголет Господь.

Таже, **Н**ыне отпущаеши: По Отче наш:.

Отпустительный тропарь, глас 4-й:

**С**ветлую Воскресения проповедь от Ангела уведевше Господи ученицы, и прадеднее осуждение отвергну, апостолом хвалящаяся, глаголаху: исповержеся смерть, воскресе Христос Бог, даруй ми́рови велию милость.

[Слава: святаго, аще имать. И ныне: Богородичен во глас тропаря святаго. Аще ли ни: Слава, и ныне, Богородичен, глас 4-й]

И отпуст.

## **В ПЯТНИЦУ 5-Й СЕДМИЦЫ ПО ПАСХЕ**

### **В ПЯТОК НА УТРЕНИ,**

**На Бог Господь: тропарь воскресен, глас 4-й:**

**С**ветлую Воскресения проповедь от Ангела уведевше Господи ученицы, и прадеднее осуждение отвергнуши, апостолом хвалящаяся, глаголаху: исповержесе смерть, воскресе Христос Бог, даруяй миру велию милость. [Дважды]

[Слава: святого, аще имать. И ныне: Богородичен во глас тропаря святого. Аще ли ни: Слава, и ныне; Богородичен, глас 4-й]

**По 1-м стихословии седален, Осмогласника, глас 4-й:**

**Подобен: Скоро предвари:**

**На** Кресте Тя пригвоздиша иудеи Спасе, имже от языков нас воззвал еси Христе Боже наш, простерл еси длани на нем волею, копием же в ребра Твоя изволил еси пробостися: множеству щедрот Твоих слава Человеколюбче.

**Стих: Дивен Бог во святых Своих, Бог Израилев.**

**Мученичен: Мученицы** Твои Господи, во страданиях своих венцы прияша нетленныя от Тебе Бога нашего. Имуще бо крепость Твою, мучителей низложиша, сокрушиша и демонов немощныя дерзости. Тех молитвами спаси души наша.

**Слава, и ныне: Крестобогородичен, глас 4-й:**

**На** Кресте Тя возвышаема яко узре Пречистая Мати Твоя, Слове Божий, матерски рыдающе вещаше: что новое и странное сие чудо Сыне Мой? Какое животе всех вкушаещи смерть, оживити умершия хотя, яко Благоутробен.

**По 2-м стихословии седален праздника, глас 4-й:**

**Подобен: Скоро предвари:**

**От** кладязя воды, земнаго и тленнаго, пришедши обычно самаряныя почерпсти, живую воду почерпе: тако обретши источник седящий, идеже источник и кладязь Иаков ископа, мира пламенопитательныя зноем напаяющий.

**Слава, и ныне, тойже:**

**Воскресение Христово: псалом 50.**

**Канон самаряныни, со ирмосом на 8: И Миней на 4. Глас 1-й:**

**Песнь 1.**

**Ирмос: Поразивый Египта, и фараона мучителя погрузивый в мори, люди спасл еси из работы Моисейски поющыя песнь победную: яко прославися.**

**Погребенный** воста, Собою воздвиже род человеческий: да радуется тварь вся, и мысленнии днесь облацы да кропят правду яве.

**К**рест вольный плотию приим, тридневен воскрес еси от мертвых, адова сокровища Живоначалниче Господи истоцив, и извед окованныя души.

**З**раком блистающася муроносицы видевши ангела, страхом бежаша от гроба: Христово же Восстание уведевши, и возвестити тщатся учеником.

**П**окрываяй водами превыспренняя Господи, Вода жизни Сый, самаряныне, просящей Твоя честныя воды, подал еси разумевшей благоутробие Твое.

**Троичен: О** Троице, верою Тя чистою славящих, Отче, Сыне и Душе, яко Творец всех спасай, и очищение даруй нам грехов, яко Преблагий.

**Богородичен: Р**адуйся, Престоле огненный. Радуйся, Свещнице всезлатый. Радуйся, света Облаче. Радуйся, Палато Слова, и умная Трапезо, Хлеб жизни достойно Христа носившая.

*И святаго Минея на 4.*

**Катавасия: Воскресения день ...,**

*Песнь 3.*

**Ирмос: У**твердися сердце мое в Господе, дающем молитву молящемуся, яко лук сильных изнеможе, и немощствующии препоясашеся силою.

**В**олею на древо вознеслся еси Слове, и зрящее распадохуся камене, и тварь преклоняшеша вся, и мертвии из гробов, якоже от сна востаху.

**С** душою Тя пришедша ко аду, Слове, видевши вся души праведных, от вечных уз отрешахуся, песнословяще яже паче ума силу Твою.

**Ч**то чудитесь? Что во гробе вы ищете с муром жены, Владыку? Воста, и мир совоздвиже, ангел блистайся муроносицам вещаше.

**Ж**изнь сый Господи, и Источник безсмертия, сел еси при источнице Щедре, и Твоих премудрых вод исполнил еси самаряныню просящую, и поющую Тя.

**Троичен: Е**дин над всеми в Троице Бог поется, Отец и Сын и Божественный Дух, Егоже страхом славят Небеснии чинове, ясно вопиюще: Свят, Свят, Свят еси Господи.

**Богородичен: Н**есказанно заченши во утробе Твоей всех Бога, Дево Мати, паче мысли и слова родила еси, пребывши Дева яко прежде Рождества, Богоневесто.

*И святаго Минея на 4.*

**Катавасия: П**риидите, пиво прием новое ...,

*Кондак и седален святаго.*

*Слава, и ныне: глас 4-й:*

*Подобен: Вознесыйся:*

Да радуется небо, да ликовствует земная, яко Христос от Девы явився яко Человек, избави из тления все человечество Своею смертию: чудесы же возсиявый жене самаряныне воды просящей, подает источник исцелений, яко Един Безсмертен.

#### Песнь 4.

**Ирмос:** Услышах Боже слух Твой, и убояхся, разумех дела Твоя, и ужасохся, Господи: яко Твоего хваления исполнь земля.

Небеса да веселятся, да празднует тварь вся, воста Господь, и явился всем премудрым апостолом Своим.

Пожертва бысть смерти твоя сила, Христу умершу, мертвии яко от чертогов, востанием Сего от гробов изыдоша.

Что рыдаете, о жены? Что с муры ищете Безсмертнаго? Воста, якоже рече, муроносицам глагола ангел.

Самаряныни Господи, просившей подал еси воду, ведение державы Твоея: темже во веки не вжаждет воспевающи Тя.

**Троицен:** О Троице Пресущная, Отче и Слове, и Божественный Душе, Единосильне, Собезначальне! Спаси нас всех верою воспевающих Тя.

**Богородичен:** Неопалимую купину Тя законоположитель, зряше древле, Даниил же гору святую смотряше, едина Дево Мати Владычице.

#### И святаго Минея на 4.

**Катавасия:** На Божественней стражи ...,

#### Песнь 5.

**Ирмос:** Возсияй ми Господи свет повелений Твоих, яко к Тебе дух мой утренюет, и поет Тя: Ты бо еси Бог наш, и к Тебе прибегаю, Царю мира.

Гроб Твой святой достигше уранше муроносицы, блистающая видеша юношу и ужасошася, Твоему научившеся Востанию Христе.

Смерть умертвися, ад пленися, сущии во узах свободишася Христовым Воскресением, возрадуимся и руками восплещим, празднующе светло.

Апостоли възграйте, и ангели ликуйте, земнороднии вси возрадуйтеся: Господь воскрес, тля испровержеся, и печаль преста, и ликовствует Адам.

Источник сый Господи Жизни, воду оставления и разумения даровал еси, жене просившей древле самаряныне. Темже воспеваем неиреченныя щедроты Твоя.

Единицу Триипостасную, Троицу Единосущную, Отца Слова и Духа Святаго, Нераздельна естеством Бога Единого почитаем, Творца и Господа и Владыку всех.

**Богородичен:** Тя дверь непроходимую, и Село невозделанное, и ковчег манну носящий, и ручку и свещник, и кадьницу невестественнаго угля, именуем Чистая.

И святаго Минея на 4.

**Катавасия:** Утренюем утреннюю глубокоу ...,

Песнь 6.

**Ирмос:** Да не погрузит мене буря водная, ниже пожрет мене глубина: отвержен бо есмь во глубины сердца морскаго зол моих. Тем зову яко Иона: да взыдет от тли зол живот мой к Тебе Боже.

**На** кресте Тя беззаконнии пригвоздиша, и копием прободоша Христе, и Иосиф благообразный Тя погребе в новом гробе: из него же со славою воскрес, совоскресил еси Спасе, всю тварь поющую державу Твою.

**Верей** и врата Владыко, сильно сокрушил еси адовы, и воскресл еси яко Бог, и срет, радуйтесь, рекл еси женам, и сих рещи послал еси учеником: воста Живот, и виден бысть, просвещаяй концы.

**Что** плачете? Что носите яко смертному жены мура? Воста Христос, вопияше древле блистаясь вельми, явлейся юноша, тщи плащаницы оставив: шедше возвестите другом Его Востание.

**Струя** сый Господи жизни независтная, и бездна милости Блаже, путешествовав седиши близ кладязя клятвеннаго, и самаряныни вопиял еси: даждь ми воду пити, яко да приимеши оставления воды.

**Троицен:** Пою Отца Безначальна, и Сына Сопрестольна, и Духа единосущна верно, Едино Существо, и Естество, и славу, и едино Царство Бога всех и Творца, Содержителя всего, со безплотными силами.

**Богородичен:** Деву Едину рождшую, и утробу нетленную соблюдушю, поем Тя Чистая, Престол Господень, и дверь, и гору, и мысленный свещник, чертог всесветлый Божий, и сень славы яве, ковчег же и ручку и трапезу.

И святаго Минея на 4.

**Катавасия:** Снизшел еси в преисподняя земли ...,

Кондак самаряныни, глас 8-й:

**Подобен:** Яко начатки:

**Верою** пришедшая на кладязь самаряныня, виде Тя премудрости воду, еюже напоившись обильно, царствие Вышее наследова вечно, яко приснославная.

**Икос:** Чистая таинства услышим, Иоанну нас учащу, в Самарии бывшая: яко жене беседоваше Господь, воду просив, Иже воды в сонмища их собравый, Иже Отцу и Духу сопрестольный: прииде бо ищяй образ Свой, вечно яко Приснославный.

## Песнь 7.

**Ирмос:** Не предаждь нас до конца имене Твоего ради, и не разори завета Твоего, и не отстави милости Твоя от нас, Господи Боже отец наших, препетый во веки.

**С**о беззаконными Христе щедре волею вменился еси, во время Божественных страсти: и сия сия видяще колебашеся земля, и камень вседетельным мановением распадешся Непостижиме, и восташи мертвии иже от века.

**С** душою спеш во страны преисподния ада, возвел еси мужеством связанных вся, яже от века смерть прият, горький мучитель, вопиющий Тебе: Иисусе Боже, слава Твоему страшному смотрению.

**С** мертвыми что вы ищете Живущаго во веки? Воста, якоже рече: се якоже видите празды плащаницы, истощен гроб, явлейся глаголаше муроносицам юноша: скоро шедше рцыте апостолом.

**В**ода еси жизни, вопияше Христу самаряныня: напой мя убо Слове жаждущую всегда Твоя Божественных благодати, яко да не ктому, Иисусе Господи, неведения содержуся зном, но проповедую Твоя величия.

**Троицен:** Отца и Сына, и Божественнаго воспевает Духа, нераздельную Троицу естеством сущую, разделенну лица, едино Существо, срасленное, безначальное, Творца всех, и Бога: Егоже вси небеснии поют чинове.

**Богородичен:** По Рождестве страшнем, Дева чиста сохранилася еси, Святая Богородице: темже ты вси ангельстии лица, и человечестии роди вси, немолчными воспевают гласы, Вместилище Чистое Невместимаго.

## И святаго Минея на 4.

**Катавасия:** Отроки от печи избавивый ...,

## Песнь 8.

**Ирмос:** Всяческая Владыко премудростию составил еси, землю же паки утвердил еси, якоже веси, дно, основанием водрузивый на водах безмерных: тем вси вопием воспевающе: балгословите дела Господня непрестанно Господа.

**С**мерть претерпел еси, Едине Безсмертне волею, ада пленил еси, врата медная стерл еси Царю Небесный, и отъял еси узники от века тамо сущия, воспевающий державу Твоя благости.

**В**ознеслся еси Долготерпеливе волею на древо, и камень распадешся, и солнце угасе, и завеса церковная раздрася, и земля поколебася, и потрепета всепосмеянный ад, и вся узники рзреша.

**Я**вился еси Господи, во тме сидящим, Свет сый Незаходимый, и Живот всех. Темже Тя яко виде правденых сонм, възграся Слове, и возопи: пришел еси вся от уз разрешити, поющыя державу Твою.

**Б**лиз сел еси источника, в час Спасе шестый, и самаряныни воду живую подал еси, и разума воды за многое благоутробие. С неюже вси вопием воспевающе: благословите дела Господня непрестанно Господа.

**Троицен:** Отца Безначальна, Сына Собезначальна поем, и Духа Святаго, Бога Единого Трое, неслиянна, непресекома, Содетеля всех, единосильную Державу, самовластную, и вопием: благословите дела Господня, непрестанно Господа.

**Богородичен:** Углем очищается Исаиа, предпроведуя мысленнаго Угля, воплощаема Дево из Тебе паче мысли, опаляюща человеков вся вещныя грехи, и обожающа за милосердие естество наше Всенепорочная.

**И святаго Минея на 4.**

**Таже:** Хвалим, благословим, покланяемся Господеви:

**Катавасия:** Сей нареченный и святыи день ...

**Стихословится Честнейшую:**

**Песнь 9.**

**Ирмос:** Сотвори державу мышцею Своею, низложи бо сильная со престол, и вознесе смиренныя Бог Израилев, в нихже посети нас Восток с высоты, и направил ны есть на путь мира.

**С**е виден бысть Живот всех Христос, повешен волею на древе: и сия видящи земля потрясая, и многа святых восташа яве телеса усопших, и узохранительница адова поколебася.

**К**расен из гроба яко Жених от чертога изшел еси, смерти разоривый мучительство Христе, и адовы верей сокрушивый силою Божественною, и Востания Твоего, светом умным просветивый мир.

**П**оставим вси ныне лики духовныя, и да зовем: Господь воскрес, да радуется земля, да веселится небо, облацы да кропят нам правды тучы, празднующыя светло и Христа поющим.

**Ж**изнь живущих, источник благих Господь, богато источаяй воду учений, вопиет жене: подаждь ми воду пити, яко да подам ти воду, грехов твоих источники изсушающую.

**Троицен:** Свет един нераздельно, Трисолнечная Единица, Безначальный Отец, Сын, и Дух, Божество едино, Жизнь и всех Творец. Того воспоим вернии со безплотными, трисвятыми песньми священнословяще.

**Богородичен:** Свету бывши жилище, Чистая, озари зеницы души моя, омраченныя многими козньми врага, и видети сподоби ясно от Тебе возсиявший Свет паче мысли, чистым сердцем.

И святого Минея на 4.

**Катавасия:** Светися, светися

Екзапостилларий самаряныни:

Подобен: Жены:

**В** Самарию пришел еси Спасе мой Всесильне, и жене беседовав просил еси воды пити, евреем воды источивый из камене несекомаго, юже к вере совосприял еси, и ныне жизни наслаждается на небесех вечно.

Слава и ныне, тойже:

На хвалитех стихиры Осмогласника, глас 4-й:

**Д**ал еси знамение боящимся Тебе Господи, Крест Твой честный, имже победил еси начала тмы и власти, и возвел еси нас на древнее блаженство. Темже Твое человеколюбное смотрение славим, Иисусе Всесильне, Спасе душ наших. [Дважды.]

**К**рестом Твоим Христе Спасе, настави нас на истину Твою, и избави ны от сетей вражних: воскресый из мертвых, возстави ны падшия грехом, простер руку Твою Человеколюбче Господи, молитвами святых Твоих.

**Мученичен:** Честна смерть святых Твоих Господи: мечами бо и огнем, и студению сокрушаеми, излиша кровь свою, надежду имуще на Тя, восприяти трудов мзду: претерпеша, и прияша от Тебе Спасе велию милость.

Слава, и ныне: глас 6-й:

**И**сточник живоначала Иисус Спас наш, ко источнику пришел патриарха Иакова, пити прошаше воды от жены самаряныни. Сей же неприобщительное иудеом прирекшей, мудрый Зиждитель приводит ю, сладкими глаголы, паче к прошению присносущныя воды, юже и приимши всем пропевае рекши: приидите, видите тайных ведца и Бога, пришедша плотию, за еже спасти человека.

Таже: Слава Тебе показавшему нам свет:

И ектения: Исполним утреннюю молитву нашу:

На стиховне стихиры самаряныни,, глас 4-й:

Подобен: Яко добля:

**С** почерпалом почерпсти, пришедши ко кладязю, почерпало без воды оставивши, едина ко граду востече, источник животекущий вопиющи обрести самаряныня, независтный. Отонудуже почерпе спасительную воду, и сею прохлади сердце истаявшее страстьми.

**Стих:** **Наляцы, и успевай, и царствуй, истины ради, и кротости, и правды.**

**В**оистинну рекла еси, рече Спас самаряныне, яко не имаши днесь мужа законна, пять бо имела еси первее, и ныне, егоже стяжала еси, несть твой муж, но закона чуждь. Яже и потщавшися сущим во граде вопияше: видех Человека, Иже изрече ми вся, елика втайне сотворих.

**Стих:** **Возлюбил еси правду, и возненавидел еси беззаконие.**

**С**трую иную животекущую, от небеснаго кладязя самаряныня почерпе, на кладязе обретши сию изливаему, из негоже тленную имяше по обычаю почерпсти воду, иную земную. Но иная входящая в сердце ея показася, аки источник иной новый, страстей орошающий распаление.

**Слава, и ныне: глас 8-й:**

**Е**гда явился еси во плоти Христе Боже, за неизреченное смотрение, слышавши самаряныня слово Тебе Человеколюбца, остави почерпало у студенца, и тече глаголюци сущим во граде: приидите видите Сердцеведца, еда Сей есть чаемый Христос, имей велию милость?

**Таже, Благо есть исповедатися Господеви**

**Трисвятое. И по Отче наш:**

**Отпустительный тропарь, глас 4-й:**

**С**ветлую Воскресения проповедь от Ангела уведевше Господи ученицы, и прадеднее осуждение отвергну, апостолом хвалящаяся, глаголаху: исповержеся смерть, воскресе Христос Бог, даруй мiрови велию милость.

**Слава, и ныне: Богородичен, глас 4-й**

**Таже ектения: Помилуй нас Боже:**

**Час 1. И отпуст.**

## **В ПЯТНИЦУ 5-Й СЕДМИЦЫ ПО ПАСХЕ НА ЛИТУРГИИ**

**Блаженна от канона самаряныни, Песнь 8-й, на 6:**

**С**мерть претерпел еси, Едине Безсмертне волею, ада пленил еси, врата медная стерл еси Царю Небесный, и отъял еси узники от века тамо сущия, воспевающыя державу Твояя благодсти.

**В**ознеслся еси Долготерпеливе волею на древо, и камень распадется, и солнце угасе, и завеса церковная раздрася, и земля поколебася, и потрепета всепосмеянный ад, и вся узники рзреши.

**Я**вился еси Господи, во тме сядящым, Свет сый Незаходимый, и Живот всех. Темже Тя яко виде правденых сонм, възграся Слове, и возопи: пришел еси вся от уз разрешити, поющыя державу Твоюю.

**Б**лиз сел еси источника, в час Спасе шестый, и самаряныни воду живую подал еси, и разума воды за многое благоутробие. С неюже вси вопием воспевающе: благословите дела Господня непрестанно Господа.

**Слава: Троицен: Отца** Безначальна, Сына Собезначальна поем, и Духа Святаго, Бога Единого Трое, неслиянна, непресекома, Содетеля всех, единосильную Державу, самовластную, и вопием: благословите дела Господня, непрестанно Господа.

**И ныне: Богородичен: У**глем очищается Исаиа, предпрведуя мысленнаго Угля, воплощаема Дево из Тебе паче мысли, опаляюща человеков вся вещныя грехи, и обожающа за милосердие естество наше Всенепорочная.

**По входе, отпустительный тропарь, глас 4-й:**

**С**ветлую Воскресения проповедь от Ангела уведевше Господи ученицы, и прадеднее осуждение отвергну, апостолом хвалящяся, глаголаху: исповержесе смерть, воскресе Христос Бог, даруяй миру велию милость.

**И храма святаго: И тропарь святаго, аще есть. Аще ли будет и другаго святаго тропарь, то рцы его: таже кондак храма. Слава: святаго. Аще ли будет и другаго святаго кондак, такожде рцы его.**

**И ныне, кондак самаряныни, глас 8-й:**

**В**ерою пришедшая на кладязь самаряныня, виде Тя премудрости воду, еюже напоившися обильно, царствие Вышее наследова вечно, яко приснославная.

**Прокимен, глас 3-й:**

**Прокимен:** Пойте Богу нашему, пойте, \* пойте Цареву нашему, пойте.

**Стих:** Все языцы восплещете руками, воскликните Богу гласом радования.

**Апостол Деяний, зачало 36. [Деян. 15, 5–34.]**

**В** дни оны, восташа нецыи от ереси фарисейския веровавшии, глаголюще, яко подобает обрезать их, заветавати же блюсти закон Моисеов.

Собрашася же апостоли и старцы ведети о словеси сем. Многу же взысканию бывшу, востав Петр рече к ним: мужие братие, вы весте, яко от дний первых Бог в нас избра, усты моими услышати языком слово благовестия, и веровати. И Сердцеведец Бог свидетельствова им, дав им Духа Святаго, якоже и нам. И ничтоже разсуди между нами же и оными, верою очищ сердца их: ныне убо что искушаете Бога, хотяще возложити иго на выи учеником, егоже ни отцы наши, ни мы возмогохом понести? Но благодатию Господа Иисуса Христа веруем спастися, якоже и они. Умолча же все множество, и послушаху Варнавы и Павла поведающих, елика сотвори Бог знамения и чудеса во языцех има. По умолчании же их, отвеца Иаков, глаголя: мужие братие, послушайте мене. Симеон поведа, яко прежде Бог посети прияти от язык люди о имени Своем: и сему согласуют словеса пророк, якоже пишет: По сих обращуся и созижду кров Давидов падший, и раскопаная его созижду, и исправлю его: яко да взыщут прочии человецы Господа, и вси языцы, в нихже наречеса имя Мое: глаголет Господь, творяй сия вся. Разумна от века суть Богови вся дела Его. Сего ради аз сужду, не стужати от язык обращающимся к Богу, но заповедати им огребатися от треб идольских, и от блуда, и удавленины, и от крове: и, елика неугодна себе быти, иным не творити. Моисей бо от родов древних по вся грады проповедающия его имать в сонмищах, по вся субботы чтомый. Тогда изволися апостолом и старцем со всею церковию, избравше мужа от них, послати во Антиохию с Павлом и Варнавою: Иуду, нарицаемаго Варсаву, и Силу, мужа нарочита в братии. Написавше рукама их сия: Апостоли, и старцы, и братия, сущим во Антиохии, и Сирии, и Киликии братии, иже от язык, о Господе радоватися. Понеже убо слышахом, яко нецыи от нас изшедше возмутиша вас словесы, развращающе души ваша, глаголюще, обрезать и блюсти закон, имже мы не заветавом: изволися нам собравшимся единомушно, избранныи мужи послати к вам, с возлюбленныма нашими Варнавою и Павлом, човекома предавшема души своя, о имени Господа нашего Иисуса Христа. Послахом убо Иуду и Силу, и тех словом сказующих таяжде. Изволися бо Святому Духу и нам, ничтоже множае возложити вам тяготы, разве нужных сих: огребатися от идоложертвенных, и крове, и удавленины, и блуда: и, елика не хотите вам быти, другим не творите: от нихже соблюдающе себе, добре сотворите. Здравствуйте. Они же убо послани бывше, приидоша во Антиохию: и собравше народ, вдаша послание. Прочетше же, возрадовашася о утешении. Иуда же и Сила, и та

пророка суца, словом мнозем утешиста братию и утвердиста. Пребывша же тамо время, отпущена быста с миром от братий ко апостолом. Изволися же Силе пребыти тамо, Иуда же возвратися во Иерусалим.

**Аллилуиа, глас 4-й:** Наляцы, и успевай, и царствуй истины ради, и кротости, и правды.

**Стих:** Возлюбил еси правду, и возненавидел еси беззаконие.

**Евангелие Иоанна, зачало 37. [Ин. 10, 17–28.]**

**Рече** Господь ко пришедшим к Нему иудеем: сего ради Мя Отец любит, яко Аз душу Мою полагаю, да паки прииму ю. Никтоже возмет ю от Мене, но Аз полагаю ю о Себе: область имам положить ю, и область имам паки прияти ю: сию заповедь приях от Отца Моего. Распря же паки бысть во иудеех за словеса сия. Глаголаху же мнози от них: беса имать и неистов есть, что Его послушаете? Инии глаголаху: сии глаголи не суть беснующагося: еда может бес слепому очи отверсти? Быша же тогда обновления во Иерусалимех, и зима бе. И хождаше Иисус в церкви, в притворе Соломони. Обыдоша же Его иудее, и глаголаху Ему: доколе души наша вземлещи? аще Ты еси Христос, рцы нам не обинуяся. Отвеща им Иисус: рех вам, и не веруете: дела, яже Аз творю о имени Отца Моего, та свидетельствуют о Мне. Но вы не веруете: несте бо от овец Моих, якоже рех вам. Овцы Моя гласа Моего слушают: и Аз знаю их, и по Мне грядут. И Аз живот вечный дам им.

**Вместо же Достойно, поем:**

**Ирмос:** Ангел вопияше Благодатней: Чистая Дево радуйся, и паки реку, радуйся: Твой Сын воскресе тридневен от гроба, и мертвья воздвигнувый: людие веселитесь. Светися, светися, новый Иерусалиме: слава бо Господня на тебе возсия, ликуй ныне и веселися, Сионе. Ты же, Чистая, красуйся, Богородице, о востании Рождества Твоего.

**Причастен:** Тело Христово примите, источника безсмертнаго вкусите.